



## **Messadi per la radunanza communal digls 12 da december 2016**

Stimadas votantas e stimos votants

Suandontamaintg az infurmainsa dallas tractandas tgi vignan discutadas e deliberadas a caschung dalla radunanza communal digls 12 da december 2016.

### **Protocol dalla radunanza communal digls 16 da settember 2016**

Digl protocol ò savia neir piglia invista, u tg'el ò savia neir retratg davent digls 07 d'otgover 2016, durant 30 deis an canzleia communal. Ainfer igl termin d'exposiziun èn inoltradas nignas protestas. Igl protocol vign damai declaro per approvo e vign sotsignia digl mastral e digl protocollist.

### **Tscherna dall'appartenenza digl spital**

Aint igl messadi dalla regenza agl cunsegl grond, carnet nr. 3/2014 – 2015, vign fixo tranter oter, tgi igl cumeegn constizunont, resp. fusiuno Albula/Alvra stoptga decider e sottemetter anfignen igl pi tard igl onn 2016 ena proposta correspondententa alla regenza pertutgont l'appartenenza ad ena regiun da spital.

Igls cumeegns uriunds da Mon e Stierva appartignivan alla regiun da spital da Surses; Alvaschagn, Casti, Alvagni, Brinzauls e Surava alla regiun da spital dalla Muntogna/Tumliastga/Valragn/Albula. Schibagn igl spital da Savognin scu chel da Tusang appartignan tenor la situaziun legala agls spitals publics acutsomatics digl cantun.

Tenor igl concept directiv digl november 2013 ed or da vista da sanadad politica persequitescha igl cantun ena strategia cun centers da sanadad regiunals, tgi cumpeglian organisatoricamaintg scu er legalmaintg tot igls furnitours da prestaziun instituziunals dalla regiun. Scu segn caracteristic d'en tal center da sanadad vala la colliaziun dallas prestaziuns da sarvetsch agl senn d'en provedimaint integro (colliaziun horizontala scu er verticala; damai ena collaboraziun interdisciplinara tranter las differentas disciplinas professiunals e coordinaziun dallas midadas ambuland/staziunaras. Eventualmaintg cun posts externs, duess da prancepi ainten en center da sanadad ena suletta organisaziun surpiglier tot igls pensums adossos agls cumeegns segl sector da sanadad („Sanadad or d'en mang“).

La suprastanza è dall'ideia da metter ansemen igl provedimaint da sanadad ainten la regiun Albula/Surses, tant scu pussebel horizontal scu er vertical. Or da vista economica publica duess neir rinfurzada l'atgna regiun; chegl tgi è er sto la fegnameira tar la fusiun digl nov cumegn Albula/Alvra. Betg igl davos vogl per mantigneir las plazzas da labour ainten la regiun. Correspondentamaintg vignigl proponia agl cantun d'attribueir igl noss cumegn alla regiun da spital da Surses. La suprastanza preferescha uscheia igl spital da Savognin e cotras ena distatgeda digl spital da Tusang. Chegl fò senn er ord vista finanziaria, percheigl tgi las structuradas digl spital da Tusang preveian stringentamaintg ena participaziun digls cumegns ve digl deficit. Loancunter prevei igl spital da Savognin betg ena tala siertad da deficit, igl cuntrari, igl spital è obliia da tigneir tgesa uscheia, tgi sa dattan an-somma nigns deficits.

Schi igl cantun attribuescha danov igl noss cumegn allas regiun da spital da Surses, ò chegl per consequenza tgi chella decisiun dada vigna midada aint igl rom dalla situaziun legala. Da chella stuess la radunanza communal decidei puspe a dretg taimp.

**Per la populaziun ègl principalmaintg decisiv: I vala la libra tscherna digl spital.** Cun l'appartenenza digl cumegn alla regiun da spital Surses vign chella libra tscherna digl spital betg restranscheida.

### **Li da scola dalla scola primara rumantscha**

Extract digl messadi cun contract da fusiun davart la fusiun digl cumegn digls 28 da favrer 2014:

*„A media vista duessan tottas scolaras e tots scolars eir a scola aint igl cumegn futur. Igl èn previas dus lis da scoletta e scola primara. Egn vign mano an rumantsch e l'oter an tudestg.*

*Per surlivgier la pressiuin da taimp digl project da fusiun dalla Val Alvra dafora, duess tar la fusiun neir cattada ena schliaziun communabla cugl Consorzi da scola Val Alvra per tot igls unfants digls cumegns rumantschs anfignen igl onn da scola 2016/2017. Senchel termin è nia disdetg chel consorzi da scola, per tg'igl cumegn nov da chel taimp possa decider libramaintg noua e scu tgi la scola rumantscha duess neir manada“.*

Igl aton 2010 on igls cumegns d'Alvaschagn, Brinzauls, Casti und Lantsch approvo igls statuts per en Consorzi da scola Val Alvra dafora, tgi ò gia per consequenza tranter oter da manar ena scola primara communabla. Sen igl onn da scola 2014/2015 èn s'associas igls cumegns da Mon e Stierva agl Consorzi da scola Val Alvra dafora cun igl li da scola a Lantsch. Chegl ò gia per consequenza d'optimar igls transports, d'adattar igls curs da posta, da curriger las ouras digls uraris da scola e d'introduceir ena meisa da mezde. Siva dalla fusiun digl cumegn, a parteir digl schaner 2015, consista igl consorzi da scola angal ple digls cumegns Albula/Alvra e Lantsch.

Actualment vignan instruias 54 scolars e scolaras ainten treis classas doblas, da chels 25 digl cumegn da Lantsch e 29 digl cumegn Albula/Alvra. La scoletta visetan 18 unfants, 11 da Lantsch e 7 digl cumegn Albula/Alvra.

Las classas doblas èn dotadas fitg bagn cun 15, 20 e 19 unfants. Uscheia pon er igls costs neir tignias a bass. Aint igl madem li da scola instrueschan scolasts da classa, persungas d'instrucziun spezializadas, pedagogs da scola curativs e persungas da tgira ainten en team. Las direcziun organisatorica, finanziaria e pedagogica antras igl manader da scola promova constanza e qualidad. Las plazzas da labour èn attractivas, persungas d'instrucziun qualifitgeidas permettan ena bunga scolaziun.

L'infrastructura a Lantsch tanscha er per las preteisas futuras. Tranter oter er agl rom digl plan d'instrucziun 21, tgi vign introduia a parteir digl onn da scola 2018/19. Igl Consorzi da scola Val Alvra dafora è sa cumpruvo fitg bagn per igls basigns dalla part rumantscha dalla Val Alvra. Per igl avigneir, chegl vot deir, ad interim, è igl li da scola a Lantsch la schliaziun oppurtuna.

La suprastanza communal Albula/Alvra propona da mantigneir igl li dalla scola rumantscha ad interim aint igl cumegn da Lantsch.

### **Preventiv 2017 digl cumegn Albula/Alvra**

Tenor las determinaziuns dalla constituziun communal az sottomattainsa igl preventiv per igl onn 2017. La suprastanza communal ò discuto igl preventiv 2017 e delibero tal per mang dalla radunanza communal.

Igl preventiv 2017 sa basa sen en pe da taglia communal da 100% e

- sen en rendachint annual final ed approvo digl 2015;
- sen en rendachint annual betg anc saro giu digl 2016;
- scu er sen las indicaziuns digl preventiv 2016.

### Preventiv Chint current 2017

Igl chint current 2017 sera giu cun expensas totalas da CHF 13'595'200.00 ed antradas totalas da CHF 13'787'400.00 cun en supraple d'antradas da CHF 192'200.00. Cumpigleidas èn amortisaziuns da CHF 1'092'000.00 (da chegl CHF 10'000.00 amortisaziuns dalla facultad da finanzas), apport da finanziaziuns spezialas da CHF 61'300.00 scu er prelevaziuns da finanziaziuns spezialas da CHF 624'200.00. Da chegl sa dat en'atgna finanziaziun (Cashflow) da CHF 711'300.00.

## Preventiv chint d'investiziun 2017

Igl preventiv d'investiziun 2017 sa basa allas decisiuns da credit dallas radunanzas communalas e dalla suprastanza.

Igl chint d'investiziun chinta cun investiziuns bruttas da CHF 3'533'000.00. Siva dalla subtracziun da contribuziuns e taxas d'attatg da CHF 375'000.00 restan investiziuns nettas da CHF 3'158'000.00, tgi on da neir finanzteidas digl cumegn. Las pi grondas investiziuns èn la sanaziun dalla Voia Viglia digl Bogn ad Alvagni vischnanca, la sanaziun dallas veias an vischnanca a Stierva, igl attatg necessari digl provedimaint d'ava ed energeia a Crest-Vazerol scu er l'equipaziun digl gôt e dall'alp da Stierva.

Ena resumaziun digl preventiv 2017 è agiunto a chest messadi. Digl preventiv detaglea pò neir piglia invista sen la pagina d'internet [www.albula-alvra.ch](http://www.albula-alvra.ch) u pò neir retratg dalla canzleia communal a Casti.

## **Fixar igl pe da taglia 2017**

Cun l'approvaziun digl contract da fusiun è igl pe da taglia digl cumegn Albula/Alvra nia fixo per igl onn 2015 sen 100% dalla taglia simpla digl cantun. Sa basond all'approvaziun digl preventiv 2016 digls 16 da december 2015, agl rendachint annual final ed approvo 2015, scu er allas investiziuns planisadas, propona la suprastanza communal digl cumegn Albula/Alvra da lascher igl pe da taglia 2017 venavant sen 100% dalla taglia simpla digl cantun.

## **Lescha federala davart igl acquist da bagnis immobigliars antras persungas digl exteriour (LAIE/ (BewG)**

Tenor igl art. 10 dalla lescha introductiva cantunala davart la LAIE/BewG; 217.600) e risguardond las decisiuns communalas fixescha la regenza mintg'onnn, an tge furma tgi igl contingent da lubientschas vign repartia. Igl cumegn vignan supplitgias da communitgier agl inspectorat digl register funsil ed agl register da commers lour regulaziun valevla a parteir digl 1. da schaner 2017 per igl acquist da bagnis immobigliars antras persungas digl exteriour. La suprastanza communal digl cumegn Albula/Alvra propona da lascher la quota per igl cumegn Albula/Alvra sen 100%.

Casti, igls 16 da november 2016

La suprastanza digl  
cumegn Albula/Alvra